

Forsætisnefnd

### *Tillaga um fjölgun borgarfulltrúa*

Á fundi borgarstjórnar þann 19. september 2017 var svohljóðandi tillaga forsætisnefndar samþykkt með 11 atkvæðum borgarfulltrúa Samfylkingarinnar, Bjartrar framtíðar, Vinstri grænna, Pírata og Framsóknar og flugvallarvina gegn 4 atkvæðum borgarfulltrúa Sjálfstæðisflokksins:

Í 11. gr. sveitarstjórnarlaga nr. 138/2011 sem tóku gildi 1. janúar 2012 er kveðið á um fjölda fulltrúa í sveitarstjórn. Þar kemur fram að í sveitarfélögum þar sem íbúar eru 100.000 eða fleiri skal fjöldi fulltrúa vera 23-31. Samkvæmt gildandi samþykkt um stjórn Reykjavíkurborgar nr. 715/2013 er Borgarstjórn Reykjavíkur skipuð 15 borgarfulltrúum, sem er undir lögbundnu lágmarki. Lagt er til að borgarstjórn samþykki að fjöldi borgarfulltrúa verði á næsta kjörtímabili í lögbundnu lágmarki, 23 borgarfulltrúar, við sveitarstjórnarkosningar sem fram fara þann 25. maí 2018. Forsætisnefnd er falið að vinna að nauðsynlegum breytingum á samþykkt um stjórn Reykjavíkurborgar og fundarsköp borgarstjórnar, samþykkt um kjör og starfsaðstöðu kjörinna fulltrúa hjá Reykjavíkurborg, sem og öðrum samþykktum eftir því sem við á.

Það tilkynnist hér með.  
Greinargerð fylgir tillögunni.

Borgarfulltrúar Samfylkingarinnar, Bjartrar framtíðar, Vinstri grænna Pírata og Framsóknar og flugvallarvina lögðu fram svohljóðandi bókun:

Tillaga um lágmarksfjölda borgarfulltrúa byggist á 11. grein sveitarstjórnarlaga frá árinu 2011. Þar segir að í sveitarfélögum með fleiri en 100.000 íbúa skuli fjöldi fulltrúa vera á bilinu 23-31, og tekur þetta gildi á kjörtímabilinu sem hefst árið 2018. Borgarstjórn getur ekki skorast undan því að ákveða fjölda borgarfulltrúa innan þess lagaramma fyrir næsta kjörtímabil og er það ekki seinna vænna. Nú í sumar lá fyrir að samþykkja að borgarfulltrúar yrðu 23. Því var frestað í ljósi þess að ráðherra sveitarstjórnarmála hafði boðað enn eitt frumvarp um breytingu á þessum lögum, þar sem lögbundnu lágmarki yrði breytt í 15 fulltrúa. Í ljósi breyttra aðstæðna við stjórn landsins liggur hins vegar nú þegar algjörlega fyrir að frumvarpið mun ekki ná fram að ganga. Stjórnarslit, starfsstjórn og pólitísk upplausn hafa því sjálfkrafa bundið enda á þessar vangaveltur. Reykjavíkurborg, sem fjölskipað lýðræðislegt stjórnvald, getur ekki látið upplausnarástand í landsmálunum ráða því hvort borgin ákveði að fari að lögum eða ekki – hvað sem mismunandi sjónarmiðum innan borgarstjórnar

líður. Rétt er að taka fram að fyrir liggur tillaga um að fjölgun borgarfulltrúa muni fela í sér að föst laun varaborgarfulltrúa og annarra kjörinna fulltrúa í nefndum og ráðum falli niður og myndi sú útfærsla leiða til þess að heildarútgjöld borgarinnar lækki um 28 m.kr. sparnaðar fyrir fjölgun borgarfulltrúa.

Borgarfulltrúar Sjálfstæðisflokksins lögðu fram svohljóðandi bókun:

Sem fyrr leggjast borgarfulltrúar Sjálfstæðisflokksins gegn því að borgarfulltrúum í Reykjavík verði fjölgað um 53% við næstu borgarstjórnarkosningar eða úr 15 í 23. Tillaga Sjálfstæðisflokksins felur í sér að Alþingi breyti lagaákvæði í sveitarstjórnarlögum þannig að borgarstjórn hafi sjálfðæmi um hvort borgarfulltrúum verði fjölgað eða ekki. Með því að vísa tillögunni frá en samþykkja um leið tillögu um fjölgun borgarfulltrúa í 23 hafa borgarfulltrúar Samfylkingar, Vinstri grænna, Pírata, Vinstri grænna og Framsóknar og flugvallarvina tekið skýra afstöðu með fjölgun borgarfulltrúa. Þar sem um er að ræða útpenslu kerfisins þarf það ekki að koma á óvart að vinstri flokkarnir líti til fjölgunar borgarfulltrúa með sérstakri velþóknun. Þeir telja slíka fjölgun og kostnaðaraukningu í yfirstjórn vera af hinu góða á sama tíma og ekki tekst að manna stöður lögbundinnar grunnþjónustu í þágu barna og unglunga.

Þórhildur Lilja Ólafsdóttir  
e.u

Samrit:  
Samgöngu- og sveitarstjórnarráðuneytið  
Hjálagt:  
Tillaga forsætisnefndar um fjölgun borgarfulltrúa

## **Tillaga forsætisnefndar um fjölda borgarfulltrúa**

Í 11. gr. sveitarstjórnarlaga nr. 138/2011 sem tóku gildi 1. janúar 2012 er kveðið á um fjölda fulltrúa í sveitarstjórn. Þar kemur fram að í sveitarfélögum þar sem íbúar eru 100.000 eða fleiri skal fjöldi fulltrúa vera 23-31. Samkvæmt gildandi samþykkt um stjórn Reykjavíkurborgar nr. 715/2013 er borgarstjórn Reykjavíkur skipuð 15 borgarfulltrúum, sem er undir lögbundnu lágmarki. Lagt er til að borgarstjórn samþykki að fjöldi borgarfulltrúa verði á næsta kjörtímabili í lögbundnu lágmarki, 23 borgarfulltrúar, við sveitarstjórnarkosningar sem fram fara þann 25. maí 2018. Forsætisnefnd er falið að vinna að nauðsynlegum breytingum á samþykkt um stjórn Reykjavíkurborgar og fundarsköp borgarstjórnar, samþykkt um kjör og starfsaðstöðu kjörinna fulltrúa hjá Reykjavíkurborg, sem og öðrum samþykktum eftir því sem við á.

### **Greinargerð:**

Á fundi borgarstjórnar þann 4. febrúar 2014 samþykkti borgarstjórn tillögu um að fjöldi borgarfulltrúa héldist óbreyttur, 15 borgarfulltrúar, á því kjörtímabili sem nú stendur yfir. Var það í samræmi við bráðabirgðaheimild í sveitarstjórnarlögum þar sem kveðið er á um að ekki er skylt að breyta fulltrúafjölda í sveitarstjórn fyrr en við aðrar almennar kosningar til sveitarstjórna eftir gildistöku laganna. Alltaf hefur verið ljóst að á kjörtímabilinu þyrfti borgarstjórn að taka afstöðu til þess hver fjöldi borgarfulltrúa ætti að vera innan hins nýja lagaramma. Tímafresturinn sem bráðabirgðaheimildin veitir hefur verið nýttur til að undirbyggja þá ákvörðun.

Þannig hefur vinna við undirbúning fjölgunar borgarfulltrúa í samræmi við gildandi sveitarstjórnarlög staðið yfir á vettvangi forsætisnefndar Reykjavíkur allt kjörtímabilið. Þar hefur verið unnið út frá því að fjöldi borgarfulltrúa verði áfram í lögbundnu lágmarki og hafa greiningar á þeim breytingum sem gera þarf á samþykktum tekið mið af því. Forsætisnefnd hefur miðað við að halda kostnaði sem hlýst af fjölgun borgarfulltrúa í lágmarki, sem er mögulegt meðal annars með því að manna fastanefndir borgarinnar eingöngu borgarfulltrúum og fyrstu varaborgarfulltrúum, sem og að stilla þóknanir af til samræmis við að vinnuálag dreifist á fleiri fulltrúa í fullu starfi.

Til að klára megi þessa vinnu þarf að liggja fyrir formleg ákvörðun borgarstjórnar um hver fjöldi borgarfulltrúa verður á næsta kjörtímabili en innan við ár er þar til kosið verður til borgarstjórnar. Jafnframt er ljóst að undirbúningur borgarstjórnarkosninga 25. maí nk. er þegar hafinn á vettvangi yfirkjörstjórnar Reykjavíkur sem og meðal þeirra framboða sem hyggja á að bjóða fram lista. Því bíða fleiri aðilar en forsætisnefnd þess að fjöldi fulltrúa liggi fyrir sem fyrst.

Þegar samþykkt borgarstjórnar liggur fyrir þarf að breyta samþykkt um stjórn Reykjavíkurborgar og fundarsköp borgarstjórnar ásamt samþykkt um kjör og starfsaðstöðu kjörinna fulltrúa hjá Reykjavíkurborg. Einnig þarf mögulega að breyta öðrum samþykktum, á borð við samþykktum um einstaka fastanefndir borgarinnar. Mun þessi vinna fara fram á næstu mánuðum þannig að forsætisnefnd geti fjallað um breytingarnar í haust og lagt þær fyrir borgarstjórn til samþykktar áður en þær stjórnsmálahreyingar sem hyggja á framboð á næsta ári hefja undirbúning sinn.